

Ontmoeting 3

Dawid en Goliat

“Moenie bang wees nie, Ek is by jou; moenie bekommerd wees nie, Ek is jou God. Ek versterk jou, Ek help jou, Ek hou jou vas, met my eie hand red Ek jou!”

Teks: 1 Samuel 17 en Jesaja 41:10

Hulpmiddels:

- Afdrucke van Dawid se sakkie met kolle
- Afdrucke van die “God is groter as my probleme” kolle
- Skêre, gom en skryfbehoeftes
- Klippies (5 vir elke kind)
- Kleeflint
- Sagte bal of 2, afhangend van groep grootte
- Klere en maskers vir: Dawid, Goliat, Saul en Dawid se pa (gaan loer na voorbeelde op KIX webtuiste)



Welkom

Die groep kinders staan uitgesprei in die vertrek (of buite). Een kind het die sagte bal in haar hand en begin die speletjie deur iemand raak te gooi. Indien daardie persoon raakgegooi is, moet sy die bal vang en iemand anders probeer raakgooi en nadat sy gegooi het, gaan sit (sy is nou uit). Hou aan speel totdat die laaste persoon die bal het. Dit is die wenner. Indien die groep te groot is, kan twee spanne teen mekaar speel (elke span het h bal). Die span wat laaste in is, wen.



Wyding

Stilwoord-ritueel uit Psalm 23: Laat die kinders kruisbeen sit en hulle oë toemaak. Herhaal 3 keer. “Die Here is by ons.” Sê nou hardop: “Omdat die Here my Herder is, is ek nie bang nie. Hy lei my deur die donker tye en Hy versorg my.”



Woord

Raai, raai wat is ek:

- Almal van ons het een maar niemand s' n is dieselfde nie. (*Gee kans vir een of twee raaiskote.*)
- Ek verander gedurig. (*Gee weer kans vir een of twee raaiskote.*)
- Soms is ek lank en soms is ek kort. (*Raai*)
- Dit maak nie saak wat jy doen nie, jy kan nie van my ontslae raak of my weggee nie, al is daar tye wat jy my nie sien nie. Antwoord: Jou skaduwee.

Vandag gaan ons luister na die verhaal van Dawid wat geglo het dat God altyd by hom is (soos sy skaduwee) al kan hy nie vir God sien nie. Onthou julle in die vorige storie waarna ons verlede keer geluister het, is Dawid gesalf as koning. Wat beteken dit nou weer? Dit was h teken dat hy baie spesiaal was vir God en dat hy God moes dien. In Handeling 13:22 staan: “Ek het in Dawid, seun van Isai h man na my hart gevind, Hy sal al my opdragte uitvoer.”

Dawid was baie spesiaal vir God. Nadat Dawid gesalf is as koning, het hy steeds aangegaan om skape in die veld op te pas, sy tyd om as die koning van die land te regeer het nog nie gekom nie. Saul was nog koning, maar God het reeds begin om groot goed te doen met die jong man. God was elke dag by Dawid en Dawid het dit geweet. In hierdie tyd het die Filistyne bymekaargekom om oorlog te maak teen die Israeliete.

Kry nou 'n paar kinders om vorentoe te kom om te help om die storie verder te vertel. Hulle kan nou die hulpmiddels aantrek (klere en maskers).

Die hele groep moet deelneem aan die storie terwyl jy dit vertel.

Wanneer jy die volgende woorde in die storie gebruik, moet die kinders hardop reageer en so saam die verhaal vertel.

WOORD WAT AANBIEDER SÊ	KINDERS REAGEER
Dawid	5 wit klippies
Goliat	Groot, groot, baie groot
Saul	O grote koning
Stap	Klap hande 3x
Hardloop	Klap hande 3x vinnig

Die Filistyne het bymekaargekom om teen die Israeliete oorlog te maak. Koning **Saul** (O grote koning) het die Israeliete aan die een kant van die vlakte laat kamp opslaan. Die beste vegter van die Filistyne, **Goliat** (Groot, groot, baie groot), het na die Israeliete toe **gestap** (Klap hande 3x) om hulle uit te daag, maar almal was bang om teen hom te veg. **Goliat** (Groot, groot, baie groot) was amper 3 meter lank en sy wapens was baie groot. Hy het gesê dat as die Israeliete wen, sal die Filistyne hul slawe wees, maar as die Filistyne wen, moet die Israeliete die Filistyne se slawe wees. **Saul** (O grote koning) en sy hele volk was baie bang.

Dawid (5 wit klippies) se pa het hom gestuur om na sy broers te gaan om vir hulle kos te vat. **Dawid** was gehoorsaam en het na sy broers **gestap** (Klap hande 3x). Toe hy daar kom, was **Goliat** (Groot, groot, baie groot) weer besig om die Israeliete te spot. **Dawid** (5 wit klippies) kon nie glo dat hierdie ongelowige reus so spot met God se mense nie. **Dawid** (5 wit klippies) **stap** (Klap hande 3x) toe na **Saul** (O grote koning) en sê vir hom hy sal teen **Goliat** (Groot, groot, baie groot) veg. **Saul** (O grote koning) was geskok en het gesê: "Nee! Jy kan nie teen hom veg nie, hy sal jou doodmaak!"

Dawid (5 wit klippies) het hom toe vertel van die beer en leeu wat hy al doodgemaak het met God se hulp terwyl hy skape opgepas het en hy sal **Goliat** (Groot, groot, baie groot) ook kan wen met God se hulp.

Dawid (5 wit klippies) het eers probeer om **Saul** (O grote Koning) se wapenrusting aan te trek, maar dit was so swaar, hy kon nie eers daarin **stap** (Klap hande 3x) nie. Hy het besluit om eerder daarsonder te veg teen **Goliat** (Groot, groot, baie groot).

Dawid hardloop (Klap 3x vinnig) toe na die stroompie toe en tel 5 wit klippies op. Hy **hardloop** (Klap 3x vinnig) met die 5 klippies in sy sak en sy slingervel na **Goliat** (Groot, groot, baie groot) toe.

Goliat (Groot, groot, baie groot) het gelag toe hy **Dawid** (5 wit klippies) voor hom sien staan. Hy het gedink hy gaan hom maklik wen en doodmaak. Maar **Dawid** (5 wit klippies) sê vir **Goliat** (Groot, groot, baie groot): "Jy kom met 'n swaard en 'n spies, maar ek kom na jou toe in die naam van die Here – Hy sal my help om jou te wen!"

Goliat (Groot, groot, baie groot) **hardloop** (Klap 3x vinnig) op **Dawid** (5 wit klippies) af en **Dawid** (5 wit klippies) sit een van die klippies in sy slingervel, swaai dit om en om en daar trek die klippie en tref **Goliat** (Groot, groot, baie groot) hard teen die voorkop! **Goliat** (Groot, groot, baie groot) val vooroor, morsdood! **Dawid** (5 wit klippies) **stap** (Klap hande 3x) na die reus toe, neem sy swaard en kap **Goliat** (Groot groot, nou morsdood) se kop af.

Dawid het gewen! Toe die Filistyne dit sien, het hul almal **weggehardloop** (Klap hande 3x vinnig).

So het God die Israeliete laat wen deur **Dawid** (5 wit klippies) te gebruik. Die Here was by **Dawid** (5 wit klippies).

Die kinders kry tyd om oor die verhaal te dink:

1. Ek wonder hoe laat die storie jou voel.
2. Ek wonder of daar goed in jou lewe is wat dalk so groot soos Goliat voel waarvoor jy bang is.
3. Ek wonder of daar enigiets te groot of te moeilik vir God is.



Werskaf

- Laat die kinders hulle probleme in die kolle skryf. Knip die groter kolle uit en plak dit bo-oor.
- Jonger kinders kan 5 klippies optel en in die sakkie vasplak met kleeflint.

Sluit af met die seënbede

